

Mál nr. 228/2012
M og
Vátryggingafélagið V v. ábyrgðartryggingar bifreiðarinnar A

Árekstur bifreiða við Vatnsenda krafa um bætur vegna líkamstjóns þ. 5.10.2009.

Gögn.

1. Málskot móttakið þ. 24.5.2012 ásamt fylgiskjöllum 1-7
2. Bréf V dags. 7.6.2012

Málsatvik.

M ók bifreið sinni við Vatnsenda þegar bifreiðin A kom á móti á öfugum vegarhelmingi og lenti á bifreið M. M gerir kröfu um bætur úr ábyrgðartryggingu A hjá V vegna meiðsla sem hann telur sig hafa orðið fyrir við áreksturinn. Af hálfu M er bent á að hann hafi í kjölfar slyssins leitað á slysadeild LSH þar sem hann kenndi sér meins í baki. Af hálfu M er vísað til sjúkrasögu M og á því byggt að M búi við þrálát einkenni frá hægri öxl, en hafi verið hraustur ungur maður fyrir umrætt slys. Þá vekur M athygli á að bifreið hans hafi skemmst mikið við áreksturinn. V hafnar bótaskyldu og bendir á að í tjónstilkynningu sé ekki merkt við að það hafi orðið slys á fólki. V bendir á að við komu á slysadeild LSH í kjölfar árekstursins hafi M kvartað undan óþægindum í baki með seiðing út í síðuna báðum megin, en batahorfur hafi verið góðar og M ekki settur í neinar sjúkdómsgreiningar. Þá bendir V á að næst hafi M snúið sér til læknis 16 mánuðum eftir slysdag og kvartað undan verkjum í hægri öxl. Þá vísar V til vottorðs Júlíusar Valssonar læknis frá 28.11.2011 þar sem segir að erfitt sé að segja nákvæmlega til um orsakasamhengi milli núverandi einkenna M frá hægri öxl og umferðarslyssins í október 2009 þar sem M hafi ekki kvartað um einkenni frá öxlinni við fyrstu komu til læknis eftir slysið.

Álit.

M hefur ekki tekist að sýna fram á að orsakatengsl séu á milli árekstursins við Vatnsenda árið 2009 og núverandi einkenna. Í því sambandi má vísa til vottorðs Júlíusar Valssonar læknis frá 28.11.2011, þar sem fram kemur að erfitt sé að segja nákvæmlega til um orsakasamhengi milli núverandi einkenna M og umferðarslyssins í október 2009. Þar sem að M hefur ekki tekist að færa sönnur á orsakatengsl milli núverandi einkenna og umferðarslyssins á hann ekki rétt á bótum úr ábyrgðartryggingu A hjá V.

Niðurstaða.

M á ekki rétt á bótum úr ábyrgðartryggingu A hjá V.

Reykjavík 10.7 2012.

Rúnar Guðmundsson hdl.

Valgeir Pálsson hrl.

Jón Magnússon hrl.